

本朝分省人物考

人物考卷之一百十三目錄

廣西全省

王顯中

于中

蘇木

曹學程

莫敬山

王溥

黃驥

王敏

馮俊

張潔

蔣昇

蔣冕

楊護

屠楷

陶魯

蔣淦

石邦柱

蕭淮

呂調陽

徐養正

張翀

沈希儀

李允簡

任良幹

唐儼

補遺

宋欽

郭本

包裕

劉天麟

曾曙

舒應龍

唐世堯

本朝分省人物考卷之一百十三

南直督學御史西浙過庭訓纂集

門人蘇松備兵副使南郡熊膏叅閱

男過銘盤

過銘孟

過銘簠

寧國府學生員嚴弘志全訂正

廣西全省

王顯中

王顯中桂平人洪武初遊太學有聲擢文趾諒江府

同知在任勤能著稱尋遷新平府知府卒于官吏民思之

于中

于中字子正廣西全州人洪武初年除本州訓導十五年擢廣東道御史以建言忤旨降歸化縣丞陞臨安州判廉潔不滓治多異政廷臣交薦補郴州同知南雄知府致仕歸

蘇木

蘇木字子和廣西陽朔縣人以進士知清豐縣治最徵拜四川道御史疏多戇直指及乘輿謫灤州判

陞南兵曹出守紹興致仕

曹學程

曹學程字希明廣西全州人以進士授知寧海扼腕
民艱心力曲盡雖權勢之阻撓當道之摧抑不肯纖
毫假借者治行稱兩浙最召拜廣東道御史督理屯
馬未幾以建言觸上怒詔逮于獄擬辟典在獄者
十年蒙恩得釋謫遠戍竟卒于戍所

莫敬山

莫敬山蒼梧人洪武中由明經舉任本縣儒學訓導
秩滿推其才學卓異陞河南布政司叅政有能譽未

幾卒於官

王 溥

王溥字士淵桂林人洪武間由進士歷官廣東右叅議時匠藝之家勢要占役弗克營生溥禁止之有奉部檄來徵舵木者立期逼取又木多不中式民苦之溥親臨揀閱十取八九先是起運俱出海道風水漂沒民不勝困溥自臨庾嶺遍觀險易命有司鑿石填澗修葺橋道教民造車運之民賴焉先是慶賀俱設筵宴溥罷之時兵起無糧無籍軍都司谷取甚亟溥曰國以民爲本今一槩起取賦稅從何出耶遂奏聞

上是之其弟來廣適遇承差何秀同舟知爲溥弟送以布衣弟至以實告溥曰一衣雖微不可不慎此污行辱身之漸也卽命還之隨遣弟歸及獻績父老遽道留不可得歷官數年筭無重衣庖無珍饌爲胥吏龐庸誣逮詔獄行李蕭然寮屬餽饁皆辭不受曰吾豈以忠難易其心哉比至得白歸卒年三十有六廣人惜之

黃驥

黃驥全州人洪武中領鄉薦爲沙縣教諭振育有方士皆向化累官禮科給事中三使西域上疏論外夷

貢馬及官軍下番之弊詞甚剴切 上嘉納之著爲
定令自是陝西之民少甦尋陞右通政奉 命撫諭
南交使還卒所著有黃門奏草數卷藏于家

王 敏

王敏南寧人永樂中任湖廣道監察御史克振風紀
尋遷交趾布政使司左叅議有政績交人愛之

馮 俊

馮俊字士彥廣西宜山縣人天順四年進士授刑部
主事歷員外郎郎中錄囚廣東多所平反陞福建按
察司副使丁外艱改湖廣整飭沅清偏橋等處兵備

偏橋屯戍數萬餉給陸運甚艱俊至設法鑿石河以通漕舟造浮橋以濟徒涉軍民稱便進廣東按察使尋陞江西左布政使擢右副都御史巡撫四川時總兵潘松者怙勢驕惰俊奏黜之馬湖土官知府安鰲虐毒其民前此巡撫者皆莫敢治俊與巡按御史張鸞按察僉事曲銳會議執之寘于法奏設流官以撫其民蜀人快之未幾卒于官賜祭葬俊嚴急有才識臨事能斷子良輔亦進士歷廣東布政司叅議

張 濬

張濬字仲湜廣西全州人成化戊戌進士改翰林院

庶吉士授編修陞侍講選侍東宮主順天鄉試陞侍
讀學士尋陞學士國子監祭酒正德丙寅 駕幸太
學賜坐講尚書尋陞禮部右侍郎轉南禮書改吏部
時儲位久虛草疏率同儕請建太子罔有傾忌轉兵
部叅贊軍務條陳八事又奏革守備廳審事官及營
伍有所委任不容請託人皆服其明決乙亥乞歸凡
疏十五上始得請特加太子少傅給驛還家卒賜祭
葬如例潔性頗剛褊與人多不合在戶部時清查連
年逋賦不少寬貸人雖沮之直行已志斷斷如也

蔣 昇

蔣昇字誠之全州人成化丁未與弟冕同登進士弘治初知南海誠心蒞政有長者風而鋤奸薙惡不遺餘力吏畏民懷徵入爲監察御史累官南京戶部尚書敷歷中外三十餘年操履清白始終如一嘉靖元年致仕臨終戒子勿求恩澤士論多之後贈太子少保

蔣冕

蔣冕字敬之全州人成化丁酉鄉試第一丁未舉進士選庶吉士授編修歷陞至禮部尚書兼文淵閣大學士加太子太傅禮部尚書兼武英殿大學士戊寅

武宗北狩命內閣撰威武大將軍勅冕上疏言內閣之職其大者口代王言凡手勅旨意俱從撰擬今事出非常遠近驚疑惟陛下受天明命爲天地神人主內而中國外而四夷孰敢不尊稱天爲天稱日爲日孰敢擅稱朱壽號爲將軍鼎鑊在前不敢奉詔已卯駕南巡至金陵大學士儲同冕扈從十二月駕旋次楊州以郊期在邇冕力請回鑾從之辛巳正月加少傅兼太子太傅戶部尚書謹身殿大學士時楊廷和柄國冕與協心奉迎世廟於藩邸入繼大統改元頒詔與天下更始多冕所裁定壬午賜金織

襲衣及玉帶勅加伯爵冕具辭癸未冕上疏論災異
及禮儀 聖諭令冕撰勅差官織造冕以南直隸災
傷重大具題請止至是已久不進稿 上命司禮監
促之且謂冕忤慢冕引罪得旨宥之尋乞休不允五
月再乞致仕 上責冕牽大禮災異爲由歸咎於
上有負重托遂准致仕還湘中杜門掃軌不通賓客
人稱其清謹得大臣體

楊 護

楊護象州人成化間任臨高知縣廉明寬仁深知民
隱恤民如子自前後官未嘗有也護承苛虐之後政

尚寬簡然能明燭下情事至先得其誠僞善惡必明
 審無大害者諭歸使更壽思多感其言而中止者獄
 無淹禁而吏無取覓民以爲便事事稱是初若無甚
 異政者行之數年民俗大安獄訟頓簡後以謗累去
 任百姓如戀慈母驢者縣門絡繹辭不能去新任梁
 尹嘆曰此無所爲而爲者可憫也吾當一屈楊君以
 慰吾民之心乃置一帙門下命驢者書名其上須臾
 帙滿持以示楊勸納所驢焉已而行車就道邑之老
 稚隨送三十里至舟次者殆千人護蒞事廉明簡肅
 民大信服民詞非干大故但批詞尾付告者自行喚

所告無不應期而至故能信孚如此

屠楷

屠楷廣西桂臨人入仕三十年至兵部尚書孤立寡交然亦無忤寡嗜好居第僅避風雨而已閉門靜息讀書其中卒年七十有二謚恭簡

陶魯

陶魯字自強號節庵廣西之鬱林人父成以副使死金華葉賊之亂官其子魯魯以父廕丞廣之新會縣方弱冠廣右徭賊流劫盡雷廉高肇以東之境破城殺吏戮掠至香山順德庶頑效尤劫殺無寧日魯召

父老於庭誓曰賊氣將吞吾城若父兄能率子弟從我以死守城邑保家族乎皆曰諾乃築塞堡與民守之中立以捍東西寇賊之衝築輔城以衛厥城浚外溝以衛厥輔城布鐵蒺藜植刺竹以衛厥溝人守其土分殊死戰別寨分兵相援一邑之勢如腹心相聯絡賊至不得犯白沙陳先生記曰徃西寇之憑陵高涼以東破關襲城勢如建瓴至此則截然而止如虹霓之收急雨由是吾民丘壠以完室家以安雞犬以寧倉廩以盈燕有歲時樂有賓客至於今各得其所者皆陶公之賜也魯多爲疑兵東西多寡賊不知方

與數賊遁則戒兵勿進賊弛備則急取之其剛柔操縱在手故賊遇之卽殪又無能遁者嘗夜飲俄起如廁潛身鑰門出城寮友索之不知其出征也故賊雖置耳目於左右其行神速不及知也功成而人多忌之其薦而稱道之者韓公雍鄧公廷瓚劉公大夏九載當滿去父老乞留權知新會縣事陞廣州府同知仍掌縣事民益用康風俗丕變總督兩廣韓公以功上聞陞廣東按察僉事奉璽書整飭兵備道建議請立總府於梧州統兩廣以制其喉舌霍詹事曰百世之功也梧有帥府兩廣乃如兩臂以護胸腹而兩賊

遂不東雷廉高肇民有寧宇又城吳川民喜曰衛我
者生我勞我者惜我公大惠我我何敢忘又九年考
最陞本司副使仍奉璽書專理戎務凡兩廣之地雷
廉高肇潯梧荔蒲府江田州之賊剽掠毒虐於西東
者討而撫之諸賊讐之於是刼其鬱林之廬焚其誥
命毀其先塋害其族黨事聞於朝乃命徙籍於東廣
魯憤不顧家益勵志討賊又九載考最陞湖廣按察
使仍奉璽書理戎務於兩廣如前賜以金綺誥命陞
湖廣布政使兼廣東按察副使仍奉璽書撫治兩廣
魯自丞至布政使凡平後山平恩平陽江平新寧白

水平潯梧荔浦府江田州諸凡斬首二萬一千四百有奇奪回被擄人暨撫散向化人十三萬七千有奇巡撫鄧公廷瓚疏其功於朝且曰魯年將衰而恩信入人且深若得魯父子相繼統領民兵其可請以世襲武階官其子荆民俾領兵隨魯殺賊以繫兵志以激成功上可之下兵部復官荆民錦衣左所百戶後以功陞千戶魯恒言除寇賊化之爲先殺之不得已也故平後山賊卽請置從化縣并學平陽江賊卽修陽江縣學平恩平賊卽請置恩平縣學他如電白新寧白水建學皆如之修厓山三忠祠以祀從征死

戰諸民兵曰吾以化殘而勸之忠義也於是民父老
爲思德之碑沒三十餘年國子生何相上言欲正祀
典於忠勇祠縣官歲行禮魯平生所禮於其廬者白
沙先生白沙先生亦曰陶節庵之治民也如治兵因
應隨機初無定體其治兵也如文士作文奇生筆端
無事蹈襲故能使人畏之而率以取勝此皆魯精神
心術之奧所運云以弘治戊申卒年六十有五

蔣淦

蔣淦字汝潔號雙橋全州人正德辛未進士授兵部
主事丁外艱歸服除補原官尋轉員外郎中出爲嚴

州府太守興利革奸四境靜肅吏無招權民知向方
歲課諸生有不合者親爲改削丁亥遭母憂起復惠
州府知府政績卓異列祀名宦陞河南左參政督運
如京自公應外毫髮無私焉陞廣東按察使辯冤獄
懲貪暴粵人德之陞江西右布政使時 聖母梓宮
南祔以一身接應江州不動聲色民不擾而事集轉
浙江左布政擢順天府尹順天徭役久弗平其他弊
政尤多淦悉心咨訪疏上四事曰議編審以均州縣
曰議優免以恤凋憊曰議偏累以阜邦畿曰議修理
以省民力 上嘉納以次舉行時譽振起詔陞工部

右侍郎會慈慶宮役竣有白金文綺之賜加俸一級
至庚子疾作三上疏乞休始得允瀕行遂以不起淦
平生慎操執每諭子弟曰吾居官苟取他日敢挾重
貲過柳浦乎故所在皆以廉介著譽

石邦柱

石邦柱蒼梧人年七八歲善詩對負奇氣見羣兒博
弈且投之十歲入郡庠以奇童稱十九舉鄉試登進
士宰南海有古循良風數月入覲士民千人疏請留
不獲丁內艱服闋補蕭縣涖任一月擒巨盜王浩王
千斤者二十七人連年荒旱緩刑薄征虔禱而甘霖

降少司徒王瓊大賞其賢爲逆瑾所忌以掩恩市私
罰粟百石遷郴州守擢貳長沙陞南京戶部郎中轉
知瑞州府俱有善政

蕭淮

蕭淮廣西桂林中衛人正德辛未進士授行人司行
人九年丁母憂十二年補原職十三年擢雲南道監
察御史十四年五月淮奏竊見寧王不遵祖訓包藏
禍心招納亡命潛謀不軌官校交通積有年歲如致
仕侍郎李士實等皆今日亂臣賊子關係宗社生靈
安危非細也宜勅錦衣衛凡濠黨與逮繫至京師究

治以快人心前鎮守太監畢真等首保濠賢行及諸
前後附勢者宜坐名罷削布政鄭岳副使胡世寧皆
守正蒙害宜急起用所有鎮巡奏乞褒獎孝行乃宸
濠詭謀不可從疏入 上勅諭廷臣曰蕭淮所言關
係宗社大計朕念親親不忍加兵特差太監賴義駙
馬都尉崔元都御史顏頤壽往戒諭之革其護衛十
六年陞光祿寺少卿嘉靖五年陞太僕寺少卿七年
陞都察院右僉都御史巡撫延綏地方九年改撫大
同未任卒於官

呂調陽

呂調陽字和卿號豫所桂林人嘉靖庚戌舉進士廷
對第二人授編修丁內外艱五年服除遷國子司業
乙丑擢諭德典內制隆慶改元擢國子祭酒尋擢南
京禮部侍郎遇 莊皇帝覃恩錄蔭一子尋以吏部
左侍郎兼翰林學士辛未副考會試已奉命教庶吉
士轉少宗伯日侍 穆宗經筵每講輒先齋沐期以
精誠悟 主往往緣傳經傳列古義以爲時政規
上亦時時嘉悅之暨修 世廟實錄稽載精覈足稱
一代良史壬申拜禮部尚書會 莊皇帝晏駕一切
典禮俱從哀次釐定條奏 神宗馭極進文淵閣大

學士協贊機密備顧問以朴忠受知於上嘗親書大字賜之其一曰樞機克慎其一曰同心夾輔萬曆甲戌主考會試是年修穆廟實錄成少保兼太子太保廕一子中書舍人是時江陵相當國每事皆專決調陽深沉簡諒于人不輕喜怒於事不輕可否故無招權攬寵之事會病肺久而足又患痿徙漸不良於行至戊寅秋決計告歸書十上乃得請賜帑金百文綺二詔乘傳以歸越歲庚辰疾作而逝廕一子中書舍人謚文簡

徐養正

徐養正字吉夫號蒙泉柳州衛人嘉靖辛丑進士讀書中秘授禮科給事改戶右劾嚴世蕃奸狀嵩怒矯旨廷杖七十謫滇之通海典史量移肇慶推官歷陞貴州提學僉事丁外艱服闋補雲南規條嚴肅集諸生於五華書院教以忠孝大節時徐波石死事沅江購得其舊寘之法撫按多其有經世略冢宰李古冲稱爲吳東湖霍渭厓之流擢南光祿少卿丁巳轉尚寶卿己未丐歸壬戌嵩逐世蕃磔起爲南通叅尋遷右通政甲子轉南光祿卿革弊興利內使戒不敢橫乙丑轉南戶侍申明部運規則丙寅晉戶部左侍郎

擢南大司空丁內艱承諭祭葬服闋撫按會薦朝宁
側席忽遘疾一夕自云真西山先生至起迎之揖讓
而卒顏色弗少變養正深有得於主靜之學能不以
死生利害動其心生平德性溫然可親而直節勁氣
又浩然不可挫也家居常却汗令二千金之餽嚼然
涅而不緇所著蛙鳴集若干卷子秋鶚舉進士官福
建按察副使

張翀

張翀字子儀柳州人幼倜儻爲文操觚立就嘉靖癸
丑進士授刑部主事與同舍高岱董傳策以氣節相

砥礪相嵩當國時楊員外繼盛沈經歷鍊以直言棄
市會給事中吳時來疏嵩父子奸狀狎與傳策章繼
上俱下詔獄訊所主使者狎獨對曰臣自求爲社稷
死耳疇能主使者卽有罪臣三人自當之會地震

上怒解發烟瘴地方永遠充軍狎成都勾諸生日執
經侍講下狎語以忠孝大節及性命之旨曰性命非
懸空者離倫物談性命非真性命也乙丑嵩父子伏
辜丁卯 穆宗登極召補吏部驗封郎晉大理寺少
卿尋轉右僉都御史巡撫南贛汀韶督軍事至則撫
流民遏尙寇平三巢又遣兵解惠州之圍疊承金綺

之賜念猺獞爲西粵梗疏請先勦古田次及八寨則
百粵無煩南顧 天子矧之後悉如所策四年庚午
巡撫湖廣晉大理卿尋晉兵部侍郎疏乞歸養萬曆
二年起兵部侍郎兼右僉都御史總督漕運丙子入
爲刑部侍郎累疏乞休歸己卯秋卒于家翀氣節才
猷爲海內所仰重所著鶴樓集十二卷傳于時

沈希儀

沈希儀廣西馴象衛世指揮使未弱冠已能馳馬手
搏賊征永安盜陷淖中騰而及于陸三酋前趨之希
儀捩頸決項死又掣刀斫酋于鎧間斷其頰尋又射

殺首曾竟却其追兵而還遷都指揮僉事荔浦賊八
千人行剽歸倉卒部五百人往扼之蛟龍滑石兩灘
相去數里希儀曰滑石灘狹引繩乃濟雖衆可薄也
蛟龍灘闊衆成列難圖矣吾欲奪其闊而致之狹伐
岸竹揭岸上編筏以爲繆頃刻成數百旗插之蛟龍
灘令羸卒數十人守之以疑賊賊果趨滑石且半渡
發伏擊敗之遷都指揮同知嘉靖六年岑猛叛姚督
府鎮奏行誅討召與計曰歸順岑璋猛嬖翁也當助
猛奈何希儀能素得土官陰事曰璋女失寵而璋心
恨猛貌合耳是可使擒猛何謂助乎督府復曰猛乘

上流勢擁兵下如建瓴邕梧危矣奈何希儀曰是不
足憂土官大率飽富貴戀巢穴所爲叛者懼誅耳豈
有遠志乎督府又慮猛且走交南曰猛走交則閉不
能歸彼豈無慮哉於是分五哨進師希儀將中哨當
工堯工堯隘而糧盡乃潛渡江詣左哨將乞糧請并
兵攻工堯左哨以分地爲解希儀笑曰兵糧吾自足
試君心耳還夜分軍三百人緣山上繞出工堯背而
煮餘糧爲稀糜食士合戰戰疾力而所遣軍則已立
幟工堯山頂矣賊大驚遂入隘得其積粟食軍乘勝
攻田州初歸順岑璋素信希儀使圖猛則遣兵二千

人陽助猛精卒千人名護女實爲間官軍得工堯則
先囂工堯破猛出走則擁入歸順左哨將知之壓歸
順境索猛歸順斬他囚首以獻而先一日希儀已獻
猛馘梟軍門矣督府議設流官希儀曰思恩設流官
反側至今若更設合從且復起不聽而田州果叛後
竟復土官田州乃平擢右江叅將右江故治柳州柳
在萬山中城外五里卽賊巢軍民至無地可田而城
中兵弱不足任前守劉璉殪于賊希儀至鼓士氣破
賊訶者耳目徧官府卽閨闥中稍動色賊在谿洞數
百里外趣知希儀至顧令熟徭恣出入嬉遊城中而

求得與徭通商販者數十人厚撫之使爲詞于是賊
動靜聲息顧往往爲我所先得每出勦卽肘腋親近
不得聞至期鳴號則諸軍立集聽令曰出某門旗頭
卽引諸軍貿貿行問旗頭旗頭自不知頃之劄營賊
衆至戰方合而伏又左右起賊大敗去已賊寇他所
官軍又已先在雖絕遠村聚賊度官軍所不至者寇
之軍又未嘗不在賊驚以爲神卽官軍亦不知希儀
何自得之也于劇賊巢得婦女牛畜果鄰巢者悉還
之惟陰助賊者還軍立勦曰若奈何陰助賊戰或刀
弩而門矚者曰罰若牛五若奈何刀弩矚我師于是

賊讐服無敢陰助賊及門矚者嘗欲勦一巢乃佯卧
病所部入問病謝不見明日入問希儀起曰吾病思
鳥獸肉若輩能從我獵乎卽起出獵去賊一二里而
止營軍中乃知非獵也最後計擒其尤黠猾善戰者
支解之四懸城門見者股慄常以甚雨淒風天冥冥
夜察諸賊所止宿散遣人齎火若砲衣毳帽與草同
色潛巢賊中夜砲舉賊大駭曰老沈來矣挈妻子蒲
伏山頂兒啼女眺往往寒凍死或觸厓石死妻子相
怨汝作賊何利至此明訶之則寂無人所散遣出他
巢者亦然他巢大驚已相聞愈益驚陰訶之則老沈

國在叅府不出也自此賊膽落或易面爲熟徭而柳城旁二童子牽牛行深山無敢訶者矣後熟徭旣伏其威信調征他巢雖懼讐不敢不往甚而大雨徭懼失期汨溪水以應至有溺死者論者以爲自廣西爲將韓觀山雲之倫能使徭不爲賊比希儀能使徭人攻賊前此未有也思恩奏設流官而州數反側不靖已聞濬有子曰金在鎮安益沟沟酋楊留者在賓州乃辭去曰留小主人在請往希儀時方憂思恩聞留言則大駭以金去賓州近而留應之且爲賓州憂賓州危則廣右之咽哽立梗矣乃婉色好語謂留曰是

岑濬第九子耶我往征思恩固聞之因作自語狀曰
岑氏其復乎已呼留入密室要賂卽得賂行爲金復
官留乃大喜且出復呼入曰韋貴徐五今分將思恩
必讐金善防之于是金果將五千人因留以見門者
懼走報請無納希儀罵曰金本土官子非賊奈何不
納則引入厚結之又引以詣兵備隨盡散其五千人
卒縛金而思恩復寧當是時非深計賓州幾失希儀
在柳度十三年移淑瀘後總兵貴州會北虜入寇詔
屯宣大未幾署都督總兵淮已復調廣西貴州在江
淮鹹販之警幾絕然天雨輒苦創痛數在告已還廣

西瓊南五指山熟黎本馴順畏法知州邵濬者黷貨虐使之而黎叛兵八年不休希儀言于督府曰法家斷獄必分首從今諸相煽從逆者如虎投奔勢不可釋他諸夷疑而勦之則傷仁撫而勦之則墮信莫若獨搗其首惡首惡平諸異志褫魄矣是公以生賜萬州也都御史聽之而黎平進都督同知賜金幣改貴州入銅平巢甚奇然秘不告人人亦莫之知也希儀膽勇機警善撫諸人爲耳目者賞不失頃刻嘗染危病所部卒至自戕于神前以禱穿手刺股痛毒諸體者皆徧最後者一人至以箭穿喉其得士如此

李允簡

李允簡字可大柳州融縣人嘉靖丁酉領鄉薦明年
會試乙榜授潼州學正丁內艱服除改夷陵攝荆門
州爲政清勤民德之陞知內江公廉自持士大夫請
乞無所得會大旱徒步暴禱赤日中令兒童歌之曰
旱旣太甚治非其人寧禍其身勿病其民三日霖雨
大足嘗於通津治石梁御史題之曰壽溪橋壽溪其
號以此旌其大得民也大學士茶陵張文隱從銓部
乞爲州守至則均徭賦剔奸蠹豪民斂跡 皇太后
梓官祔顯陵調度有方事集用簡有白金文綺之賜

秩滿當遷張文隱復乞展一年俟黃籍成於是在茶陵者蓋十年矣始陞雲南同知攝守澂江有豪奪民田勒令歸主不服再訴于朝下法司皆如原論陞思州府知府孤城多寇遣其孥歸獨與孫炳文居適有銅仁之役還郡五日麻陽苗龍許保等僞爲哨兵突入城殺掠允簡與孫炳文皆被執留郡二日劫以歸寨往苗每執郡邑長吏必求厚贖院司及守將亦幸朝廷不知也率許之遂以爲常允簡以爲 天子命吏爲賊劫質何面目復臨士民上乎傳語守將石邦憲亟進兵勿以我爲念邦憲不應自出盤山關至嶺

塞崖高水深遂自投下賊驚共拽之出氣息僅續棄
之途而去思人昇還至清浪衛而卒事聞詔贈貴州
副使廕一子諭賜祭葬

任良幹

任良幹字直夫號南嶠廣西桂林人積學修行舉廣
西鄉試赴禮闈不第就官湖廣潛江縣學諭學諭五
年是爲嘉靖十三年甲午適陝西鄠縣王邦相者先
是携其幼子六兒往投巴縣劉主簿主簿王姊夫也
至則不禮焉會亦失官歸王不得已乞與同舟又且
病主簿恚之至潛江欲下諸水屢不得死乃推而棄

諸路旁逸去父子匍伏行乞市中居無何父因子獨乞間行乞良榦所告之故哀之遂躬詣困處致醫藥館穀備至王病且死泣數行下亦泣曰若無憂吾爲治後事歸若子乃買地葬立石焉收六兒子于家與弟同卧起令學書報書于順天府通判爲王族兄居無幾何亦卒書未達鄆而王氏以主簿獨歸意見殺訟起成獄則通判之父爲翰林九思得遺書篋中六兒手模在焉或疑書詐其母劉思子垂死見之泣曰吾兒其指缺此當是也使次子持金至潛江取子當是時已行取赴京行時誠家人王氏來取子無留一錢

也至則家盡却其金而厚遣之母子得全主簿獄解
爲人剛明倣儻而心慈愛其在官興廢舉墜自勵冰
霜至其表尚書孫顯之墓買張武之棺而恤其家配
僧尼恤貧士陰德種種蓋其天性然也

唐儼

唐儼全州人少游鄉校父蔭嘗知郴州歸老於家得
危疾時儼年十二恒侍疾不懈迎醫視之弗能療儼
泣曰是非藥石所能攻也潛割右臂肉鼎臠進之父
啜之良愈未幾父疾復作而歿儼哀毀如成人見者
傷焉儼游學從兄於亳其嫡母蒙寢疾於家儼妻鄧

氏年十八奉其姑甚篤蒙疾劇鄧曰吾婦人安所事
湯藥吾夫以臂肉療吾獨無以療吾姑哉於是割右
脇肉以進蒙而蒙病亦愈儼聞母疾馳歸至則無恙
久矣儼拜其妻曰此吾分也當亟召我子何自苦如
此鄧曰子事母婦事姑有二道哉方危急之際雖召
子何及且事必遲子安用婦爲儼嘆曰吾得子吾無
憂於事親矣是時督學使者廉知其狀錄儼於廩以
粟帛給其妻儼事嫡母甚謹生母宋儼事之兼隆而
儀節衣食視嫡殺焉曰禮不敢踰也蒙歿二十年而
宋歿儼朝夕號慕葬宋於金盆山廬其側三年寢苦

負土惟從一童子龍蛇虎豹縱橫其間儼日取薪水
甚疲樵牧相其勞儼曰吾爲母氏爾豈敢以私勞煩
諸君卒謝遣之金陵顧璘知全州慕而訪之賦詩以
詠其事書山之壁曰望母巖先是觀風者多重儼欲
上其事於朝儼辭曰事親以盡吾心耳名於儼何有
使儼以親故得名非儼志也嘉靖乙酉儼以貢至京
師縉紳聞儼名多欲見之儼輒避之後儼肄業南雍
有司奏之旌其門

補遺

宋 欽

宋欽蒼梧人正統中擢湖廣叅議十四年麓川亂尚書王驥西征欽督餉不避艱險於辰沅清浪鎮遠山行乘騎又乘小舸艘往安江洪江苗賊要害至盧溪被賊遮留欽率兵挽弓揚矢迎敵厲聲歷數其罪詞氣壯烈賊不敢逼歷官湖廣左布政致仕天順六年寇陷梧州城欽罵賊遇害

郭本

郭本字道克融縣人景泰二年進士歷官御史七年巡按貴州又巡浙江時權璫肆惡本疏劾之謫雲南永平典史得量移太平府同知久乃擢知太平抱才

未伸每鬱鬱不自得堅以疾告歸

包裕

包裕字好問臨桂人成化戊戌進士以撫州推官徵授御史弘治元年巡按貴州寬洪仁恕耻以鷹擊鷙蠹爲能凡事務通民情不怒而威尤加惠乳獨悉收之養濟院亡失所者已出爲雲南僉事歷副使會邊夷叛督兵討之有功錫鏹金所區畫地方事宜不刻意立異而惠澤自廣滇人賴之移病歸日以詩酒自娛採山釣水登覽嘯歌泊如也所著有拙菴稿

劉天麒

劉天麒字仁徵臨桂人弘治壬戌進士爲工部都水主事分司呂梁正德初閹人擅勢有自南都詣北者舟經呂梁天麒不爲禮及橫索頗裁抑之其人怒詣去入訴諸閹諸閹誣奏遣官校往逮繫錦衣獄榜掠備至卒不服乃謫安莊驛丞居未幾王主事守仁亦謫龍場驛至則與天麒定交天麒病卒守仁爲文祭之并經紀其喪事嘉靖初詔復其官賜諭祭

曾曙

曾曙廣西臨桂人由舉人爲平湖令愷悌慈祥清介絕俗其爲政多尚安靜不事華飭尤專意學校獎訓

士類先是邑頻災迄嘉靖甲辰歲凡五月不雨苗悉稿死秋大饑曙力請當路出粟賑之仍開置廠所十餘設粥以食饑者緩不急之征節無經之費遇死屍橫道則潛然泣下捐俸易棺以葬會當路催征甚急曙毅然曰吾職可罷民不可毒有逋稅者咸縱使歸業勿之繫民得免轉徙溝壑之苦然曙竟以緩征罷去去之日號泣遮送者以千數民至今咸思之今祀于名宦

舒應龍

舒應龍廣西全州人嘉靖壬戌進士歷官戶部侍郎

兼右僉都御史總督漕運轉工部尚書應龍歷任中外表表各有樹立而督漕之政尤籍籍輿誦方召用而卒士論惜之

唐世堯

唐世堯號觀柏廣西平樂縣人萬曆丙戌進士授寧波府推官庚寅陞吏部稽勲司主事歷文選郎主考廣東壬辰以起廢忤上旨斥爲民世堯雖僻處西粵而文章獨得正宗分考浙江主考廣西甄收多知名士其樹立綽有可觀而品行亦卓然不可及云



人物考卷之一百十四

雲南全省

蘇海鎮

李忠

張文禮

張謙

丁嵩

趙彥

張昺

李純

張英

蘭剛

張隆

段子澄

張璫

楊一清

李華

趙弼

呂 禴

滕 檣

張志淳

張 繹

張 敏

陸 經

李文中

王 璟

劉 洙

雷應龍

孫繼魯

唐時英

趙 愷

馮世傑

趙汝濂

張 合

吳 懋

嚴 清

董漢雲

張西銘

朱珮

趙德宏

李元陽

戴仁

楊禧

李資坤

張勉

紀經綸

王廷表

楊元

張鍾

吳潤

趙禧

楊忠惠

王用之

符節

補遺

楊士雲

楊南金

張素

朱光霽

本朝京省人物考卷之一百十四

南直督學御史西浙過庭訓纂集

門人蘇松備兵副使南郡熊膏叅閱

男 過銘盤

過銘孟

過銘簠

寧國府學生員嚴弘志

句容縣學生員劉孔揚全訂正

雲南全省

蘇海鎮

蘇海鎮太和人洪武間以經明行修辟授蒙化學正能以忠信勸化夷習頗著勞勩九年例應考滿憚道遠不出家居或至闕食客至唯煮茗清話而已或勸其爲貧而仕不應終其身不悔

李忠

李忠初名特昆明人洪武二十五年選貢入監高皇帝宣見便殿賞齎甚厚賜名曰忠雲南舉進士自忠始後任陝西鳳翔知縣扶弱抑強威猛兼濟有循吏風

張文禮

張文禮寧州人少敏捷志向卓爾沉潛純粹不爲習俗所移以選貢中永樂癸丑南京鄉試登甲戌進士第不樂仕進求任劍川學正後補四川江陵學正遂乞休致居鄉教人名士多出其門

張謙

張謙字抑之昆明人宣德初貢入監選監察御史巡按江西卓持風采剛厲執法及監鄉試痛革夙弊科號得人尋陞湖廣按察司副使卒于官

丁嵩

丁嵩永昌人天性篤孝奉母陳氏曲致甘旨雖處顛

沛流離而生養死葬舉無違禮家貧無以爲業乃開館教里中子弟多所成就洪熙元年舉懷才抱德辭不就宣德間詔下求言嵩陳首務戎機八策一曰正心術則天道應二曰重經筵則宗社福三曰開言路則聞見定四曰用賢才則政治美五曰總大綱則庶務舉六曰汰冗兵則財用足上嘉納之徵至中道病卒所著有橫峯樵唱

趙彥

趙彥趙州人宣德壬子舉人敘州高縣令仁恕公廉廢具舉正統十年郡守妬之削籍還鄉後四年芒

部作亂筠珙諸夷皆起從之時都御史招撫諸夷皆曰惟趙縣尹來當卽降于是辟彥彥至單騎赴敵諸夷納款凱還奏功詔復彥職仍治高尋卒于官

張 曷

張曷字德遠永昌人天資清俊嗜學飭行足以表正鄉閭正統初侍郎楊寧舉爲子弟師後家日饒裕乃以千金置義田以濟宗族之貧婚葬孀居皆有常給予姪有不善責令改而後已鄉人券貸而負者焚其孤寡無依者別置室鞠之教以藝業長則爲之婚配凡周貧不欲人知亦不令人感有犯之者終不較有

司請爲鄉飲賓竟不赴尤善於行草人皆珍之所著有鈍菴稿地里撮要藏于家至今子孫之盛人以爲積慶所致云

李純

李純昆明人舉人少時不羈有智略正統間任監察御史巡按遼東時國家有土木之難純曰胡虜以我兵勤王而西必出吾不意不可不防於是選精銳八百騎指屬險要急令防守虜果有二萬騎直趨遼城未至二十里純設伏兩路待虜半入舉火擊之虜首尾斷絕不得相救斬獲無算以功陞左副都御史食

一品祿仍巡撫遼東自是虜莫敢窺遼邊矣後改巡撫榆林大虜壓境純微服潛行賊中盡知其虛實回鎮集將官嚴兵攻虜所不備虜大敗斬二千餘級虜遁去寂無消息邊庭甚賴之卒於官

張英

張英字時俊昆明人爲人長厚與物無忤事母克孝正統戊午發解居胄監時祭酒李時勉以直言獲罪英率諸生詣闕求以身代遂蒙原宥自是譽望日著英卽乞歸養居鄉以易教授生徒甲第者多出其門卒年九十有四黔國武僖公以禮葬之

蘭剛

蘭剛字德中騰衝千戶愈之仲子也正統六年隨父報効征麓賊俱有功愈累陞副千戶剛亦當授所鎮撫乃告愈曰吾先祖嘗守禦斯土爲正千戶後調會川遺我父子在此幾不立今幸獲功願併之倘得授如祖職顧不可乎愈曰吾豈弗思紹先人但武廕以長我死當汝兄承之置汝何地剛曰爲子弟亦惟竭力於父母耳若大人光復先業他日雖歸之兄剛與有榮乃偕白於靖遠王公嘉其孝讓併功於愈爲正千戶愈卒長子誠襲剛無難色後膺壽官年八十六

而終

張隆

張隆字伯興建水人正統間由國子生授杭州府知事以廉能被薦歷陞本府知府有濬湖築堤功入覲治行爲天下第一天順間聞母訃奔歸廬於墓側有狐兔馴擾之異人以爲孝感云

段子澄

段子澄太和人天順壬午鄉試第一始爲諸生時不納奔女路還遺金及入場屋考官得其試卷屢感異夢知其爲端人遂薦之後除德安府通判以內艱遂

不起居鄉秩然盛德雅量未可以一節數也

張璉

張璉字廷璧平夷人成化二年登進士第八年授南京刑部主事歷官員外郎中以明允著名尋陞重慶知府遇事迎刃而解郡中翕然太治丁外艱復補郡治績卓異弘治初元南贛閩廣夷寇爲亂陞江西按察司憲副整飭兵備旣至治城池積糧糗練士卒修器械設險隘嚴防禦一道賴以無虞修建諸縣堡城人皆稱便尋以一言不合飄然去任羣盜復起巡撫兩廣都御史鄧廷讚特奏南贛不可一日無璉詔可

之聞命卽日就道遂築南康城新學校羣盜聞風解
散尋以疾辭歸璉剛直不阿論事達大體兩綰郡綬
再秉憲節所至以廉能果敢著遇盤錯迎機立斷墨
吏斂手歸橐蕭然卒於家

楊一清

楊一清字應寧安寧州人幼讀書過目不忘以奇童
薦入翰林 憲廟命內閣選師教之受業於黎文僖
淳年十四中順天鄉試時已抗顏爲人師登成化壬
辰進士授中書舍人文譽籍甚從遊門下者皆海內
名士二十三年擢山西提學僉事力祛宿弊學政肅

清會丁憂去服闋補陝西提學副使大作士類愈久
愈嚴士凜凜守法命郡邑製諸禮樂之器俾諸生肄
習諸禮久之絃歌盈於西土凡所首取恒多中式或
許以將來科第及冠世名世必卒如所言五十餘年
用之未盡當其時雖宗室不能奪生員之婚雖撫按
縉紳不能撓課試之權爲國朝提學之最久之召爲
太常少卿提督四夷館十四年轉南京太常寺卿壬
戌虜火飾入寇馬政廢弛乃遷右副都御史督理茶
馬疏請擇材任使旌別淑慝官勸政舉宿弊以除又
處置牧馬茶馬鹽馬實濟邊用十七年清出荒熟牧

地凡十二萬八千餘頃十八年題准招商自出資本
買茶轉運茶司每一千斤給價五十兩卽以茶銀置
買馬疋官商兩便事例至今著爲令甲子虜賊大舉
邊軍請京軍會勦大司馬劉大夏薦爲陝西巡撫兼
經理邊務一清卽上疏具陳邊事劾罷總兵武安侯
及兵備不職者數人裁抑鎮守中官支應歲省數千
金創城平虜紅古二處以援固原築垣瀕河一帶以
捍靖虜虜遂不敢渡河乙丑冬虜數萬入寧夏乘勝
直抵固原遠近危疑一清率帳下五十餘人趨會總
兵曹雄議方略衆遮道不可叅政安惟學曰公行何

恃一清曰以身殉國成敗利鈍非所計也竟去賊圍
各營見挑選新兵軍容甚盛賊駭之又聞一清且至
乃移侵隆德夜薄城下一清連發火炮響應如數萬
人酋長疑大兵至遂掣衆北走一清發平涼時道無
行人關中震恐衆謂與郭子儀單騎見虜相類在陝
未逾年百務具舉正德改元 朝廷以邊患方熾兵
權太分命總制全陝三邊軍馬一清以寧夏花馬池
係要害地虜數由以入率官屬沿邊巡視議處方略
上疏極陳戰守之策修濬牆塹以固邊防增設衛所
以壯邊兵經理寧夏以安內附又謂河套者周之朔

方漢之定襄赫連勃勃所建統萬城也唐築受降城
在河套之北正統以後寢失其險旣舍受降而衛東
勝又撤東勝而就延綏河套爲虜甌脫巢穴其中冰
堅入套東寇宣大西寇寧固厥患無窮乃條上六事
悉中機宜丁卯歸休逆瑾柄國逮詔獄賴大學士李
文正救免庚午慶藩寘鐫叛起爲總制鐫擒仍晉總
制靈州土人苦漢官科虐一清昔時革之旣去尋作
至是減科徭十之二禁泛濫接遞以恤人馬閱土漢
官兵巡視各邊堡閱舊築邊牆高厚堅完嘆前志未
遂有老去寸心猶未死仗誰經略續餘忠之句入城

督同鎮巡訪求將領之賢否而更置之約法定令以從人便條陳地方急務十事請蠲寧夏各路旱傷稅糧以卹困窮溥恩賚以安反側旌忠節都指揮楊忠等以勵臣節改調管糧叅政復設理儲僉事管官極論糧儲缺乏請發內帑召買以免派買之患又條陳河西事宜欲調延綏寧夏陝西兵分道而進驅逐出境修復沿邊墩臺以圖經久莊浪告急選靖虜蘭州健兵一千令指揮陳松統領援之兵至而賊遁自固原至蘭州所在缺乏糧草河西尤甚軍多枵腹生怨乃量發各帑藏令兵備守巡二司官分道招糴酌量

城堡大小緩急分派運納以舒目前隨將議處儲蓄
數事馳奏時劉瑾素憾一清不得已起用尋悔之乃
矯詔令專在寧夏撫馭實陰奪總制之權無何瑾伏
誅衆但知瑾之誅爲永所發不知永受算於一清以
成之也逾月召爲戶部尙書尋加太子少保戶部自
逆瑾查盤禍作守臣不復儲積故邊儲一空一清行
各邊巡撫將見在官銀多方召糴公私稍備辛未年
順天應天山東河南盜起一清上十一事 上嘉納
之復改入吏部凡瑾所排陷者連茹以起國是復定
及劉六劉七等聚衆數千充斥近圻要朝廷宥罪廷

議將從之一清執不可曰中原百姓敢稱兵煽亂罪在不赦必易將增兵殄滅乃已命侍郎陸完提督星馳帶勅兵駐江南以備截殺又恐奔通海二州以趨山東令勿撤淮鳳兵而賊以就擒寇平加少保甲戌乾清宮災上疏其一視朝太遲其二祀郊廟太慢其三創梵宇於西內其四調邊兵於禁地其五謂皇莊皇店及織造等事言多切直是年命入內閣以時事多乖言不盡用乃因災異上疏自劾曰近日紀綱縱弛風俗傾頽賞功太濫刑罰失中讒言可以惑聖聽匹夫得以搖國是禁庭雜介胃之夫京師無藩

翰之託一切弊政大異往年是宜地震天鳴日食星
變旱乾水溢報無虛月覲顏在位將安用之疏入近
倖錢寧啣之遂謝政歸後武宗南征特幸其第宴
飲賡歌兩晝夜左右有導上幸浙者一清從容婉
諫遂不果行嘉靖四年再起總督三邊卽以四事上
疏謂邊儲莫急於開引中鹽邊卒莫先於召募選擇
將校莫先於訪求器用要害莫先於分兵控制俱蒙
議行五年以少師兼太子太保吏部尙書武英殿大
學士再召入閣首陳五事一曰聖學二曰聖政三曰
聽言四曰宥過五曰和衷上俱見之施行六月疏

乞罷差官織造上諭已有旨令安靜行事毋擾地方
會求直言疏舉賢才收人心 上嘉納之復條陳修
省事宜曰祭告曰寬恤曰聽言曰用人曰革弊皆切
修省之實 上以張錦奏遷顯陵之事諭一清對曰
地道尚靜體魄宜安山陵既定鎮靜已久大事既襄
體魄已安無故舉遷恐有他虞況 獻皇帝大葬之
後 陛下自藩邸升爲天子不謂之吉壤可乎竟不
果遷 世廟成 章聖太后欲謁 廟一清奏對以
爲今制無 母后謁 廟之文累朝亦無謁 廟之
事遂止初張孚敬桂萼二臣恣肆著聞 上亦厭之

言官多有論列疑一清所授二臣行時卽私謀於霍
韜霍懼有齒寒之勢遂上疏毀一清於朝上始疑
之遂再疏乞歸霍復諷言官論劾乃奪其官衆謂其
當辨一清曰吾心無媿得失在彼吾何辨哉後卒於
家十二年命復其官贈太保謚文襄

李華

李華字子實成化戊戌進士授密雲知縣太僕寺丞
程蕃知府不赴或勸之華曰吾住京師十八年粗得
一第以慰吾親教子之勤始願畢矣且貴賤榮辱有
如奕棋竟不起布衣絲帶里巷優游不異野老家無

梁肉之奉出無車蓋之華與當路顯貴交未嘗少于私卒之日無以爲殮貨其屋以易棺

趙 弼

趙弼字廷直太和人成化辛丑進士授邯鄲知縣以約已推誠爲治及爲太僕寺丞守官惟謹見僚友馳競則恥之罷官里居與農夫偶耕槃跚泥潦中晏然自足似未嘗顯者同榜有姚祥爲本道分巡至弼廬弼時耘田遂棄鋤于田畔見之詞色自如祥問生事何窶曰差勝諸生時矣道謝而別祥再三欵美弼女不得于夫女忽暴死壻恐恐不知所措弼至教壻曰

生死由命其寬厚大都如此

呂禴

呂禴字宜簡昆明人舉人成化間知湖廣隨州嚴明廉慎七年如一日不苟言笑時旱傷禾禴素衣跣足躬禱年饑殍集道上盜賊乘機爲害禴發倉賑救盜息民安自是夜戶不閉道不拾遺居官以節用愛人爲本文廟祭常以鹿胙奉上官覓鹿遇豪家償價甚高禴曰神不享非禮況虐民祀神乎以羊易之民間咸悅初夏民納祗候錢禴曰五穀未登錢必假貸於人者其如剗肉醫瘡何却之他事率多類此

滕 檣

滕檣字秀之永昌人天性穎敏過目成誦舉成化丁未進士歷官南京戶部主事員外郎中清苦持重督運會計周悉一無所取未幾以親老乞歸竟不赴任嘗爲親友勸駕就道忽念及親養輒弛裝不行如是者再家居淡薄不治產業與人平易可親非慶賀未常一至公門日以詩文爲事所著有永昌百詠歸田錄等集藏於家

張志淳

張志淳字進之號南園永昌人成化庚子鄉薦第一

甲辰登進士弘治間授文選主事後爲文選郎中循
部規采輿論用賢拔滯門無請謁與前文選天台黃
元昭齊名正德初擢太常少卿提督四夷館晉南京
戶部右侍郎尋致仕功名事業中外著稱晚年著書
自娛天性聰哲六藝咸精嘉靖間進階通議大夫十
六年詔有司問勞年八十一而卒所著有南園集西
銘通南園漫錄永昌二芳記行於世長子含舉人以
詩名次子合壬辰進士仕至叅政

張 繹

張繹文宗子字思紹號東崖寧州人弘治丙辰進士

初知南溪縣事擒劇賊韓積德等置之典刑勘永寧
納溪軍民事原情定獄咸服其罪遷四川僉事藍賊
之亂多所招降添栢林遞運減巴州解銀官民稱便
以貴州兵備副使致政歸家絕跡公府日事簡編所
著有東崖錄諸稿

張敏

張敏字時勉先海鹽人祖從征雲南遂爲大理人少
負奇有才名舉雲南鄉試屢上南宮不第弘治己未
始拜蘭州知州蘭州密邇虜巢虜時剽掠州民苦之
敏嚴譏察奸細至趨擒獲斬之自是虜不敢輕入州

氓多家村落城中惟藩邸軍衛人素侵暴百姓輕州
官敏乃一切裁以法民始安生屬河漲壞梓橋民以
皮囊渡多溺死敏度材鳩工親督役數日橋成民不
病涉善聽斷摘人陰伏多曲中遇事敢爲嘗劾牧地
之久爲豪右所據者盡追復之還官遷西安府同知
專督儲餉期歲完逋者五十萬而民不怨擢馬湖知
府適川蜀盜起鄆藍廖喻諸賊首勢猖獗甚自夔蔓
延保順諸郡營連十餘里衆號數萬兩川震動總制
洪公鍾聞敏雄武有謀略特屬任之敏請以邏兵自
當一面曰賊雖凶獷然皆烏合之衆易與耳進遇於

通門鎮麾衆大呼直前無不一當百賊奔追斬幾盡
溪水盡赤自是氣沮喪所向有成鎮巡倚以爲重巡
撫都御史林公俊上其績鄢旣就擒其黨廖陳輩復
糾衆爲亂每曰洪公謂渠魁已伏誅餘出脅從法宜
撫定若一槩兵之恐玉石俱焚非天兵弔伐意然衆
莫敢任事乃獨請往遂單騎入賊營賊露刃以俟敏
曰吾爲活汝來寧畏死也因宣布德意曉以禍福衆
感激泣下賊首陳詣軍門聽撫散其黨二萬餘人廖
憤陳先受招乘夜刦營將并害敏笑曰吾不怖死但
恐大兵具至汝輩無噍類耳賊爲之吐舌時淮自浙

省來得報冒鋒刃入賊營願與敏同死敏以宗祧事重趨之出貽書兩司宜急進兵攻賊母以予故遺地方患又與其家人嘆曰以死勤事予之分也汝第治裝歸賊尋悟送敏出營旣出營偶墜崖傷足乞致仕不許復起治兵事旣而都御史彭公澤來代洪總制因問平賊計策敏謂賊旣撫而叛非實有降意特借是以老我師宜及公初至亟集兵勦之可絕後患彭公竟用其言平賊

陸經

陸經慶樂人弘治壬戌進士累官南京兵部郎中賦

性耿介力辭伊王金帛却土官陸世爵五百金貧約終身卒之日棺殮不具

李文中

李文中字宗周號瀘濱臨安衛籍先斲春人弘治甲子鄉薦筮仕大理寺司務以明允稱調吏部綜理精詳部事不可更者寧忤冢宰至持正抗法則斬如也陞禮部員外議禮坐杖僉憲四川獨整風紀斷獄不頗賊寇秦栢周天星倡亂奉命撫勦踰月而平去蜀民有崔李_子來之謠歷固原兵備破虜克捷後以年老致仕

王璟

王璟建水州人自幼聰穎孝友天植十歲喪父事母以孝聞爲諸生時粵人張貴謫戍臨安鬻妻爲回籍之資相別哭甚璟遇卽以所得廩銀三兩贖之乃歸其券時以裴度擬焉後登進士授懷寧知縣實心實政興善育才儒林丕振治水有功人民永賴之祀於名宦正德初徵拜御史激揚風紀時逆瑾擅權璟抗疏力詆朝中以真御史目之按蜀繕兵番人憎服改路瞿河行免水患蜀中亦祠祀之致政歸日與親友爲樂有二疏之風買祭田以供祀置義宅以居族制

劉洙

劉洙字道源新安所籍先閩縣人正德戊辰進士歷
官都給事中在諫垣十二年以蹇諤著名疏武廟
遊樂五事肅廟端治本十事皆見嘉納又請改新
安所之地舉十八寨之兵劾兵備副使王昊之乖法
薦臨安知府朱疏之廉能時議黷之有奏稿若干卷
藏于家里居置義田以贍宗族施棺藥以濟貧窮建
家塾以育子弟隆慶三年入祠祀之

雷應龍

應龍字孟升蒙化人正德中進士任御史嘉靖五年督兩淮監課賦性峭直不顧利害其禁私鹽先束官捕之倚法爲奸者及議掣鹽深思博訪慎重周密必求官商兩利不輕差官以開弊門會郡邑諸生請禁淫祠卽下令毀州縣淫祠無數械治廟祀僧道以左道惑衆饗利者悉抵于罰士論稱快後以勤政積憂疽發于背而卒

孫繼魯

孫繼魯字道甫號松山其先浙之錢塘人高祖維賢以太學生言事謫戍雲南右衛遂家焉甫弱冠通書

史已卯舉于鄉登嘉靖癸未進士出知湖廣澧州因
尋改國子監助教以經學著歷戶部員外郎中監運
使大著冰蘖聲尋擢守衛輝一以公廉惠愛爲亟
會歲多蝗復大旱竭誠以禱蝗害除大雨隨應民以
爲神當路特薦調知淮安府亦遘旱禱之又輒應民
間每晨焚香尸祝之無何中官奉命織造江南道經
淮大作威福抗阻之于是構誣于朝械逮京師賴執
政夏公之力獲解調知貴州之黎平宣猷敷德苗亦
格心靖州叅將歎曰與其選將董率萬兵守備諸邊
莫若選廉吏一人足矣擢湖廣提學副使士以得師

爲幸擢山西左叅政分守薊南強藩斂戢嗣陞山西
按察使行之日宗藩以其持法銜之相與解其裝惟
敝衣履數事而已衆咸嘆服至_是持法益堅兩臺交
薦之百姓樂其久任而惟恐其去雖宗藩亦以爲請
乃擢陝西布政使晉秩提督雁門等關兼巡撫山西
右副都御史會有西陲之事持論與總督翁公不合
爲文數百言誓于神慷慨忠義之氣溢于言表及封
事與總督公交上而執政者故先翁而後孫竟被誣
下錦衣獄先是陝西侍御楊公爵者以言事在獄中
無楮具相與取破碗書壁倡和百餘首命曰破碗集

久之知公者百口直之而山西宗藩抗疏救辦卽前
解裝肆挾者也方讀易獄中進退存亡付之一編而
執政者阱之不已會疽發于項遂卒年僅五十朝野
聞而哀之隆慶改元言官疏其非辜乞賜褒錄制贈
兵部左侍郎謚清愍

唐時英

唐時英字子才號濟軒曲靖人嘉靖己丑進士知平
陽縣縣以賦稅不均大爲民困爲請於當道履畝清
丈凡六閱月而一邑之田腴瘠高下盡得其情冊定
而兼并侵尅欺漏飛詭之宿弊脫然盡洗縣有陂塘

歲久淤淺乃度田興役貧富均勞湊蓄有則啓閉有
期明年大旱平陽獨稔邑人德之乙未授戶部主事
委理通倉時新革中璫出給皆由曹司方日偵伺求
以中之一年之內秩然有理官軍便之至今守其成
法權稅九江俸薪自給蕭然無營取前人語揭之柱
曰寬一分民受一分之賜蚤一刻舟行一刻之程其
年考課戶曹首最歷員外郎中出守真定府簡易宜
民不隨不執庶務全集立加裁決訟無畱獄案無滯
牘賦去其私徭省其冗在任三年十膺薦剡甲辰晉
貴州副使接丁內外憂起補河南叅政遷浙江按察

使晉山東布政尋轉左馭歷所至咸有能聲遂拜副都御史巡撫陝西在任三載邊鄙晏然乃疏乞致仕而歸歸則脩清淨之緣飯僧印經像設菴院廣作佛事自甲子以後絕不御酒炙泊然獨處一樓盡屏僕御夜偷兒入樓褰帳見其凝然端坐惶懼叩首諭之曰汝盡取去卽吾所施也仍從容指以去路萬曆乙亥春命具棺衾擇葬地爲文祭之有丙三二十五之語不解所謂明年三月二十二日辟穀不食日但飲水數杯至二十五日侵晨索紙書偈頃之曰入此門多年今果得大受用生死關頭去來無住今日之午

吾當逝矣沐浴更衣禁勿悲泣忽風雨晦冥若有所擁而上升者而端然瞑逝矣享年七十有八

趙愷

趙愷尋甸人性行誠朴爲鄉人所重嘉靖六年鉗賊攻城愷首率衆與賊拒敵力不能支爲賊所執以刀加頸欲協從之愷詒之曰待回率家眷相從賊信釋之愷至家集衆於前泣曰今賊勢猖獗人民殺戮殆盡吾惟有死而已我若死汝等舉火焚屋毋致我屍骸暴露可也遂登樓自縊而死家衆亦舉火闔家皆自焚止畱幼男景新年甫十三以他出得免知府劉

愧卽故址築垣爲趙氏佳城撰文往祭知府魏公濟以詩輓之

馮世傑

馮世傑爲諸生剛方有氣節嘉靖六年銓賊攻城傑携母李氏弟妹匿迎恩橋下爲賊所獲刼奪罄盡母曰婦裸體赤身廉恥喪盡矣不若死之爲安遂投水死傑謂其弟曰患難不能救母苟全性命何以自立於人世弟兄亦投水而死

趙汝濂

趙汝濂字敦夫太和人十五歲浮涪水偶見鄰舟乘

迴漩將覆喚舟子急移已舟救之舟人曰灘漩如此
往救恐亦不免曰彼生吾亦生彼死吾亦死坐視其
溺豈人乎卒之兩舟皆濟所活二十餘人父聞之喜
曰吾有子矣自是益勵問學嘉靖改元壬午中雲貴
鄉試壬辰成進士選翰林院庶吉士乙未授吏部考
功司主事歷考功郎應補文選乃白之於冢宰曰頃
者考察一任積怨已深伺候兩府趨起風旨此豈迂
拙之所能耶明日詣內閣辭皆曰宜晉四品曰四品
之例在銓郎則可在某則不可與其爲人所忌不若
爲人所忘諸老皆喜一時輿論多之甲辰由尙寶轉

太常寺少卿轉右通政丁未轉太僕寺卿庚戌轉太常寺卿尋轉右副都御史協掌院事辛亥同南京吏部考察京官是年自陳奉旨對品調外任歸里二載准以右副都御史致仕隆慶改元例進正奉大夫卒于家時年七十有五爲人簡默平居言呐呐若不出口及廷中有大論議蹇蹇不少阿屈聞者悚然爲考功郎主京考察事人謂曰兩閣下私人須先請問否則匪直損官而已艷然曰若此何用考察爲哉竟入部明日堂上唱名王左都曰御史某某應改調曰此數官者未聞其過王曰雖無過然乏風力曰不宜御

史猶宜別官改題可也王默然久之首肯曰是部屬
魏某端人也本堂周尚書欲黜之力爭不已周怒而
詈亦詈諸老解曰考功雖無所聞本堂必有所見姑
從之勿爭遂削其籍堂事卽畢部院欲散復申言曰
今年考察不虧人只虧一魏郎中耳頃之科道拾遺
奏上獨留之後魏官至兩淮巡撫考察疏名將上時
冢宰謂曰黜中有某某者內閣之姻黨某某內閣之
門人某某內閣之愛幸此疏一上恐爲衙門累曰郎
中不自顧惜斯無患矣冢宰又曰趙某者內閣倚信
決不可黜曰趙某不黜無可黜之官矣竟持疏納奏

明日旨下果留趙某等三人無他患也後時趙某與
嚴氏聲勢相倚總制淮浙威震中外相遇于途趙曰
昔時會殺人今能否應之曰殺人而人不死恨刀不
鉅耳趙怒目而去其于利害之際深沉不撓有如此

張合

張合字懋觀雲南永昌衛人侍郎志淳之子九歲能
誦古文十歲能屬文賦詩稍長卽善書工畫一時以
爲奇絕年十三時兄含貢如京師合賦萬里別贈之
右圖左書書兼篆隸分行諸體諸名公見者皆嘉歎
稱傳焉嘉靖壬午舉鄉試第一往侍郎公鄉舉亦第

一滇中以爲盛事而合年財十六歲耳後十年而舉
壬辰進士授戶部山西司主事尋改兵部職方司癸
巳以母憂去丙申服除改吏部稽勲司久之調考功
司是年復以父憂去甲辰起復考功尋陞稽勲司署
員外郎蓋一官十三年不遷云久之爲當道所忌外
補福建僉事陞貴州叅議轉湖廣副使治行在湖廣
尤著會忌者陰中之竟罷去無何卽卒壽僅四十八
歲

吳懋

吳懋字德懋其先山東寧陽縣人國初戍大理遂

爲大理人弱冠能爲古文辭藻思逸發前輩以陸機目之兼工篆籀行草成都楊升菴修撰謫居相與甚善嘉靖庚子中鄉薦三試禮部不偶廼就銓除順慶府通判到任甫一月會蜀中採木檄之董解人謂懋初任不省茲役皆私爲危之懋曰行止非人所能也命也遂受檄而行旣而如京師諸同事者多失事繫獄懋獨得竣事而還以所存銀數百金還官帑上官異之屬郡缺守檄攝守事凡一切利害應罷行者無不悉心力而爲之未嘗以攝署自苟又委署雅州廣安州所至以廉惠稱撫按交薦于朝甲子陞漢州知

州懋曰體力慚衰豈宜久役乃疏謁上官求致其事
弗許會病且革取筆自題其像曰爾貌蒼然爾口呐
然履仁義如坦途付死生于適然沸潭之水湛然月
之光皎然非無非有打破鴻濛混沌天擲筆
而瞑時年五十貧不能歸自撫按藩臬而下皆悼惜
之又遣官護之郡士民執紼十餘里民有舁輦送至
家者

嚴清

嚴清字直甫號寅所雲南後衛人鄉先達光祿施昱
擇壻得清以女歸之嘉靖癸卯舉於鄉明年成進士

除富順尹能聲大騰以救荒課爲天下最丁母憂再
除邯鄲尋入爲工部屯田司主事歷員外郎郎中督
修外城及九陵皆斤斤謹出納所省費以巨萬已
工成當叙丁父憂復除兵部車駕坐忤權貴出知保
定府歷陞至四川右布政使隆慶戊辰擢都察院右
僉都御史巡撫貴州尋改四川乃具籍川課之當輸
京者議割二十萬金就近改給陝西軍餉罷郡縣卒
之團操擾民者貢番入邊則爲定限額數額外不得
浮一人他約束一切以惠利爲本而痛持豪家悍吏
以法以是士大夫譽誹常叅半候調五年起督鴈門

關不果改貴州入爲南大理寺卿尋改北歷刑部吏部右侍郎陞刑部尚書執法不骫權勢時上眷注方殷而以病歸矣歸之日遣使慰勞仍賜馳傳以萬曆庚寅卒于家性檢厲勤於事於趨舍辭受尤廩廩所居官身自與僮僕食麤衣敝蕭然也橐中裝雖圖書琴鶴不敢取諸人蜀王慕之遣使致扇餌微餉不受初拜尚書貧不能具服色束素犀帶以朝或指戲之公釋褐時玳瑁七品帶故在耶笑曰不然夫犀帶不裝金安知非玉吾顧恐難爲上耳朝貴相傳以爲美談

董漢雲

董漢雲字昭仲河陽人進士爲節推時郡守與倅皆嚴刑淹禁民咸質成於漢呼爲董青天官至僉事家居不以勢籍產不以事干謁入城過里舍輿而徒其謙卑類如此

張西銘

張西銘字希載寧州人幼穎異年十三五經皆成誦博極墳典善詩賦弱冠聯登甲第授江西金谿縣令縣多豪猾召其首者數輩諭禍福許其自新衆皆悔過悉還宿所侵尅縣以大治會郡大饑各縣民競起

劫掠獨金谿人相戒毋敢有爲盜者縣有虎患西銘
爲文禱于神虎遂遁去田蟲傷稼亦隨禱而滅治行
爲江西第一拜河南道監察御史按遼東治城塹關
軍實効邊將失律者境內以寧按蘇松諸府至鎮江
發策賑饑所活甚衆常熟民錢氏爲怨家誣以不軌
錦衣千戶承命往勘將兵圍捕勢甚急西銘亟止
之曰此誣訟也不用圍捕期三日盡械其屬訊之果
無顯狀送京卒白而歸弘治間爲京畿提學多士悅
服尋卒平生博雅修潔爲政識大體不屑屑苛察一
時卿相皆悲其不究厥施云所著有鶴軒稿行於世

朱珮

朱珮字鳴朝鶴慶樂人生而穎異登嘉靖進士任評事平反冤獄甚多大廷尉以下咸稱其有古良吏風爲貴州僉事調停驛傳民用以安計縛元惡不費兵餉爲湖廣副使除豪右增隄防楚人至今稱便爲廣東叅政設墩堦如要害獯寇不敢出沒嶺南盜起邀阻水道不數日乃降陞陝西按察使未任乞休居鄉恂恂若未嘗有官者

趙德宏

趙德宏字有容鶴慶人舉人累官至慶府長史爲人

孝友謙恭父遠爲按察知事在京病痢宏爲嘗糞父
卒哀毀骨立旅食無貲假貸營殮徒跣偕傭人肩柩
以歸旣葬廬墓三年嘗有一白犬自來相伴小鳥巢
於桃樹呼卽啄食知府汪標聞而異之親至墓所慰
贈有加巡按御史唐龍奏聞榜其居曰孝子趙氏
之門歷官所至以清白稱判順慶日郡有疑獄三事
久不能決宏一訊洗其寃者十餘人及知潼川贖鍰
悉令輸粟得粟萬八千石明年蜀大饑死相枕籍獨
潼川得免潼川城圯數十年莫能興宏措置重建基
月而竣民不知勞潼人立祠祀之又當路推委撫麗

江鹽井夷情土舍高鵬者密饋銀八百兩宏力拒之
土人愧服里居囊橐蕭然嘉靖間撫按存問復榜其
門曰孝廉

李元陽

李元陽字仁甫號中溪大理人爲兒時不與羣兒嬉
戲親師友好讀書及弱冠夢異人授錦三丈許逼令
吞之旣寤胸次猶梗塞爲諸生力學稍暇輒登城睇
覽見山海風雲藻思悠然煥發爲文有奇氣決疑義
皆出人意表凡天文兵法諸書過目洞識其要居常
求靜地默坐欲究性命之奧且謂世儒口耳之學未

盡得其旨歸後中雲貴鄉試第二人赴試禮部下第
入國子監順天諸生多從講授每作舉子業求元陽
因其文而導之元陽信筆揮灑一題數首各成理趣
寓邸有高樓日登之默坐至忘食忽一日午坐有悟
自云天理流行之實今乃見之再應試中第十四人
選庶吉士第二名尋以議禮忤權臣出補分宜到任
數日卽赴江西科場事竣聞太孺人訃分宜舊俗凡
縣令丁憂里出布銀縣貳先斂以俟元陽駭曰何以
汙我力却之出示令民自領散歸途至質衣物以爲
費服闋補江陰會鄰縣靖江海寇劫庫官吏遇害賊

猶未散元陽整旅教演水操賊乃遁去操江巡撫潘公珍以國士待之特薦于朝以地通海當要害乃建城樓嚴兵衛增所未備兵賴以安巡撫顧公徵逋負甚嚴各縣死者動以百計按部至常州民莫不疾首元陽曰逋多不可卒辦且以完報巡撫素相信得免刑者二百餘人自是一邑心感爭自輸納江南厚俗獨稱江陰矣去之日流涕遮道者百里餘旣遷戶部主事與常州唐順之浙屠應垓等聯會賦詩號十才子時選宮僚大學士夏公招之皆不赴吏部霍公韜知元陽有賢聲改監察御史及爲言官獨立不阿彈

劾不避權要巡按入閩將出京大學士招飲手出官
名納公袖謂宜薦剡也比至廉知其貪黷皆入劾疏
所至風靡一省廓清監臨場屋得人最盛初避嫌不
自出題試錄則盡出其手識者評爲天下第一至今
人稱誦之上議幸承天上疏乞止上怒欲撻之
是夜臺臣悚懼不能寐元陽獨寢睡達旦候命三夜
皆如此內外稱爲真御史後扈從出京聞大學士所
選官僚皆江南富室卽于行在疏劾至承天又進皆
爲中官所匿出補荊州知府久知荆襄之間四百餘
里無井無泉暑月徒役擔負每以渴死至卽捐俸穿

數十井又作石池以飲馬荆地濱於大江古堤旣圯
州縣皆爲藪澤巡撫顧公璘發庫銀八萬責之司水利
者了無成績元陽毅然爲之甫暮而堤成蓋前此
所未有也荆人名其堤與井皆曰李公先是江之南
許有數村約萬餘戶元陽謂村當徙於江中沙洲不
爾當爲魚鼈人皆以爲迂未幾村爲水蕩獨洲無恙
章聖梓宮歸承天闕寺乘勢肆暴所至府守皆被縛
例以三千金贖不然推溺水中一日候祭白袂驛寺
人鐵彈如雨撫按而下皆奔避元陽獨不移寺人皆
吐舌曰奇男子也自出京至此僅見此人遂免縛首

疏藩府不利於長吏者十事藩府自是斂戢嘗試諸
生得太岳張公卷評曰此子當爲太平宰相列之大
百人之首以外艱去任盡荆之人皆垂涕往送三百
里內遮拜不絕未幾夏公當國以前郟中之也罷官
歸里以來不營生理薄於自奉而厚於施予平生口
不言人過雖童稚亦溫然接納其教人曰一誠字何
事不辦中年大有所得著心性圖說鄉人有爭及爲
不善欲質於其間或至中途自相悔罪而返曰爭至
訟庭愧見先生升庵楊公嘗與坐終日每出謂人曰
見李先生之貌如臨水月令人鄙吝自消聆李先生

之語如聞洪鐘令人矇迷頓醒既倡明性學亦時與諸生講授文藝郡之通顯多出其門凡與從游者類能敦世善俗賦詩作文初不經意援筆輒就世以唐白香山宋蘇東坡擬之年八十餘聰明矍鑠每登高陟遠少壯莫能及儀觀秀整望之如神仙然卒之前十日召門人子弟示曰自今數至十日寅時吾當謝世吾嘗以一死生外形骸爲念今其時矣至期端坐而逝

戴仁

戴仁太和人舉人由教諭累官鎮遠知府府舊有美

稅四千餘金爲交際之需前守以強半入私橐日增
稅額商賈患之仁至則編稅爲三百六十分以備日
支羨二千餘盡裁罷亦不暴于當道人或勸之暴曰
暴則張已之長形人之短非吾心也述職得循良上
考臺省旌其門曰循良進松茂兵備歸里不治第館
賓于門設榻于屏自號無懷先生卒之日家無餘財
郡守吳晟泣數行下爲之殯殮

楊 禧

楊禧舉人任榮經縣教諭上 太宗文皇帝書言時
政辭激切因繫獄頃之釋繫拜監察御史遷知慶遠

慶遠素號難治禧至儉約誠信以臨其民期月而諸夷相率歸之任滿且行民夷遮道畱之臺臣上其事復畱三年將行民又畱如初乃以叅政品服食俸仍知府事歷十二年晉叅政遂乞骸骨歸特進左布政

李資坤

李資坤字伯生號雲巖昆陽人舉人幼以孝友端謹聞歷知縣主事員外郎中知府所至如開渠堰復侵田均田賦建城雉平寇亂立關築堤興學置租卓有成績去後士民感其功德一建生祠兩祀名宦焉

肅宗朝考廉吏第一居家置義塾不詣公府性剛介

原合而好古信義言動必以禮老而彌篤積書萬餘
卷研誦以終自謂一蠹居士嘉靖三十九年督學使
陳善採衆議以風範特異行州立祠祀之

張勉

張旭字希安劍川人舉人授黔州知縣平生清心寡
慾居官有膽略縣有巨寇刼掠四出十餘年莫能平
勉至纔彌月計擒渠魁一時臺省大吏拊髀歎美又
都臺督責空運甚急屬吏莫能逆民且逃散勉止之
曰吾能爲汝達之事上果得減徵民乃安集明年卒
于官將屬纊時其妻問曰何以歸襯曰寄葬重慶不

然化骨或賣子亦無不可士民立祠以祀之早以經術教鄉人人稱爲龍溪先生云

紀經綸

紀經綸字肫夫號西潭臨安人舉人天資純朴忠信不欺里中稱爲篤行君子居喪三年不入寢室待繼母如生視族人如已平生語言不妄女色不邇鬻婢貌異詰其故婢曰父伍百戶立功貧迫至此遂爲已女厚嫁之人謂有馮商之風舉人馮文奎卒于京以同憲卽傾囊助回人謂不讓麥舟筮仕上蔡有賊黑龍黑虎黑象爲邑大患設策募勇三賊就擒漢召杜

一溝九十里許從古不能通乃胼胝沿源三溝大關
荒蕪恍若南畝人有清時召杜之稱委修襄陽泊岸
計作桃椿築之兩臺有勲勞獨著之薦出納藩襄萬
金秋毫不染會病卒嗣王痛悼不已有存心如青天
白日操守似烈日秋霜之贊所至皆祠祀之

王廷表

王廷表字民望號純菴少時穎敏讀書再過目輒成
誦比屬文學校以奇童稱之弱冠領隆慶庚午鄉薦
登甲戌進士授台州推官行取刑部主事員外郎中
操持甚謹讞議甚正不避勢要陞四川僉事而歸杜

門著述學博而才捷孝友之行人所難及

楊元

楊元字務本號象山永昌人潛心理學終日靜默須
悟邵子先天數學人有叩者無不驗爲諸生卒業太
學而歸遂隱居不仕幅巾深衣甘貧樂道從學者甚
衆兩鎮兵憲重其爲人嘗饋遺以濟其貧一無所受
不得已則封識藏之待其去任還之所著有納甲圖
九圭數學聖指南行於世鄉里老少貴賤皆稱象山
先生

張鍾

張鍾字子鳴保山人端重孝友後舉鄉薦任湖廣岳州府推官正辭剔寃聲重一時嘗槌伏巨奸不屈闕官當道稱之進南京工部都水司主事屢遷營繕司郎中尋以疾告歸遂決意恬退處家十五年淡泊自如非慶賀不履公府清風高節雖閭巷能知之及卒惟圖書數卷付其子士林稱曰西村先生

吳潤

吳潤字時雨騰衝人溫恭有度篤志慕古事親以孝稱應貢不忍遠違其父偕之京授溫江訓導過籍省墓父客死潤扶襯返葬哀號毀瘠服除補上海陞雙

流教諭模範端嚴善於啟迪士子久而益慕乃立教
思碑祀於名宦子璋字朝獻少遊學中鄉魁過浙問
學於陽明先生居三年所養益粹署長壽教諭先教
化後文藝士皆興起入名宦陞知東鄉縣縣新割難
治惟以興化善俗爲務以內艱回士民不忍釋去居
家恬靜和易可親無謾辭無惰容學者稱爲執齋先
生

趙禧

趙僖字景福河陽人幼直質力學與李蕃爲友情誼
最篤及鄉薦同榜人咸異之上春官不第卒業成均

遷貴州永從知縣有廉惠聲尋以內艱歸服闋再謁
京師歎曰祿本爲養而親不逮矣仕復何爲遂白銓
曹拂衣歸里清修苦節足不履於公門鄉飲尊爲賓
者三十餘年乃卒

楊惠和

楊惠和南人寄學雲南府賊祖倡亂軍門方議招
降欲遣人持示賊營以散其黨無敢前者忠惠承委
卽行竟爲賊祖所害提學道匾其門忠義

王用之

王用之鎮南人以監生任交趾慈廉州知州適交趾

叛用之執節不屈被殺後同何忠等贈官恤後

符節

符節字性善永昌人平生耿介寡合嘗與丁貞友善
貞病篤謂節曰吾兒幼不可托吾有白金八百兩托
於汝吾兒長可付則付之否則君之物也節遂密藏
於丁宅地中貞卒節後撫其子且教之比其長卽完
付其金封識宛然隣有婆婦無子迫於饑寡乃自經
使人救之日給飲食二十年迨卒治棺葬之所著有
圯坂堆詩一卷

補遺

楊士雲

楊士雲字從龍號弘山弘治辛酉薦雲貴鄉試第一
登正德丁丑進士選庶吉士改授工科給事中奉

詔查盤湖廣糧儲事訖取道省親會丁外艱哀毀骨
立輿疾復命往返燕黔不受驛廩服除之後親識勸
駕曰太孺人在堂何忍去離又不能奉親于萬里之
外遂決意不出太孺人疾歿旣禫祥始至京補戶垣
見俗尚迥別當途非數候不得見閭人非重賂弗爲
通遂以病著籍吏部遣人以督學暨司業報曰疾病
餘生非可久于京土者廼上疏乞骸骨旣歸探討六

籍而於康節皇極甘石星經枕籍勿去各爲詠贊明
其所得後以上壽考終焉

楊南金

楊南金字用章雲南鄧川州人弘治十二年進士由
泰和知縣選陝西道御史以不附瑾黨罷歸起補江
西道御史養病起湖廣僉事陞江西叅議疏請致仕

張素

張素雲南安寧人嘉靖癸未進士授南京戶部主事
轉北戶部郎操持嚴正風裁凜然京師謂之部屬風
憲補湖廣僉憲兵備茶陵脩舉臺憲一方振肅辨疑

三十餘事湘潭之民有寒谷春陽之稱洞庭窩賊十八家官兵不敢跡捕多方設計擒殄之盜息民安後累官右副都御史巡撫四川開誠布公恩宣威著定松藩糧賦寬新例加科時銅仁北箠陡叛集兵征勦轉輸征調百計區畫捷聞有白金文綺之賜遂乞休致累疏得允年六十有三以疾卒于家

朱光霽

朱光霽字克明號方茅雲南蒙化人癸酉領鄉薦上南官弗利嘉靖壬辰授重慶府通判自奉清約催科撫字犁然當于人心謠誦滿道聲望大起有僉事發

銀買簪時視府篆遂持銀入白曰通判自幼但知讀書未學造簪也僉事且怒且慚而寢撫臺善詈人府任以下皆屬鞭笞獨遇之以禮退謂人曰朱通判非常吏也會有獄變人危之捕獲無遺上官相顧稱其能丙申遷知綿州州多勢家私役州民至則悉除之一日有稱尚書府家人徵州夫栽田者曰公田乎私田乎其人曰雖私田舊規也乃揭律令示之其人不悟而索愈固于是呼吏出罪囚使領曰此數百指可爲栽田用矣其人曰恐不可曰吾亦以爲不可聞者哄然其玩世徃徃如此三年遷西安府同知時有修

復河套之役百務填委酬應各有攸當益爲監司所
喜織造貂璫擅作威福吏大小望風跪拜獨挺然不
爲屈膝其治獄明允多所平反長安人擬之爲包孝
肅委署華州朝邑蒲城諸邑所至有惠政關中御史
楊公爵不輕許可獨致書謝之謂其有益生民久之
累乞致仕撫按諸司再三勉留不告而去飄然長往
竟歸白下時邸報以陪點僉憲曰卽爲僉憲宦味只
如此耳堅不赴時論高之